

Capitulu 18

Induve certe persone maiò finiscenu
per rinunzià à e so idee fatte

U Sgiò Babbu, cum'è vo l'avete vista mentre stu racontu, era omu di decisione rapide. Li ci volse quantunque una bella settimana per riflette à a situazione è fà fronte.

Accumpagnatu da i so più boni ingenie-rii, tense parecchi cunsiglii di direzione. U Sgiò Trunadisce ci partecipò. Si chjose in lu so scagnu, solu, è passò ore sane u capu trà e mani. Pigliò note ; è e strappò.

À l'ingrossu eccu cum'ella era a situazione : Tistù avia i ditoni verdi, si ghjuvava di i so ditoni verdi, è ghjuvendusi di i so ditoni verdi, avia fattu piantà l'usina di Mirepoil.

Ben intesa, i ministri di a Guerra è i capi generali ch'è s'appruvisiunavanu di solitu in Mirepoil, avianu subitu subitu rivucatu e so cumande è ritiratu i so clienti.

– Tandu, vale quantu à chjamà un fiuristu ! dicianu.

Ci era una suluzione, ben intesa, chì vense à mente à qualchì persona senza imaginazione : chjode à Tistù in prigiò, perchè chì scumudava l'ordine, fà sapè in la stampa chì u perturbatore ùn pudia più nuce à nisunu, rimpiazzà à i cumpratori i cannoni frunduti da arme di mudellu currente, è mandà una circularia à tutti i generali infurmenduli chì a manifattura ripigliava a so fabrica cum'ella era nanzu.

Ma u Sgiò Trunadisè... iè, u Sgiò Trunadisè ellu stessu, s'upponia à sta suluzione.

– Disse senza mughjà. Omu ùn si rimette micca cusì facilmente d'un colpu simile. Per una bella stonda, a malfidenza hà da pisà nantu à i nostri prudutti. È po, chjode à Tistù in prigiò, ùn ghjuveria à nunda. Farà cresce querci, e so radiche lamparanu i muri, è scapparà. Omu ùn si po oppone à e forze di a natura.

U sgiò Trunadisè avia assai cambiatu ! Dapoi u ghjornu di a caduta in lu salottu, e so arechje s'eranu schjarite ; a so voce s'era calmata. È po... perchè ùn dilla micca ? U Sgiò Trunadisè

suffria d'imaginà à Tistù in custume di galerianu girendu in tondu in una prigiò, ancu puru in una prigiò fiurita. A prigiò face parte di isse cose ch'òmu fideghja tranquillu per quelli chè no ùn cunniscimu. Ma quandu ellu si tratta d'un zitellucciu ch'òmu tene caru, tuttu cambia.

Malgradu i rimproveri, i zeri, u pattone, u Sgiò Trunadisè, subitu ch'ellu si parlava di prigiò, scuprì quant'ellu tenia caru à Tistù, quant'ellu avia affezione per ellu, è ch'ellu suppurtaria male d'esse privatu di vede lu. Eccu cum'elli sò qualch'è volta quelli ch'òmu mughjanu forte forte.

D'altronde, in ogni modu, u Sgiò Babbu si saria oppostu à l'imprigionamentu di Tistù. U Sgiò Babbu era bravu è bonu, à vi aghju digià detta. Era bonu è ghjera mercante di cannoni. Detta cusì, l'affare ùn viaghja micca incù i so pedi. Tenia caru u so figliolu è fabricava arme per rende urfagnu i zitelli di l'altri. Quessa, si vede bella più spesso ch'òmu crede.

– Aviamu riesciutu dui affari, disse u Sgiò Babbu à a Signora Mamma. Fabricavamu i più belli cannoni, è aviamu fattu di Tistù un zitellu

felice. Ma pare chì ste duie cose ùn possinu più andà insemi.

A signora Mamma era dolce, bella è brava. Una persona squisita. Stava sempre à sente incù assai interessu, è ancu ammirazione i detti di u so maritu. Dapoi u disgraziosu affare di a guerra di i Vaici, si sentia à pena colpevole, incerta, senza sapè di chè. Una mamma si crede sempre à pena colpevole quandu chì u so figliolu scumoda a vita di e persone maiò, è po avè qualchì penseru.

– Chì fà, o caru, chì fà ? Rispose a Signora Mamma.

– Ciò chì m'inchietta, ghjè a sorte di Tistù quant'è quella di l'usina, ripigliò u Sgiò Babbu. Ci aviamu fattu una idea di l'avvene di stu zitellu ; pensavamu ch'ellu avia da piglià a mio seguita, cum'è aghju fattu eiu incù u mio babbu. Avia a so via aperta, a fortuna, a cunsiderazione...

– Era una idea fatta, disse a Signora Mamma.

– Eccu ! una idea fatta, è bella pratica. Avà, ci tocca à truvà ne una'altra. À stu zitellu, l'armureria li piace pocu, si vede bè.

– A so vucazione pare purtà lu di più ver di l'urticultura.

È u sgiò babbu s'arricurdò e parulle fataliste di u Sgiò Trunadisse « ùn si pò nunda contru à e forze di a natura. »

« Hè detta, ùn si pò nunda contru à ste forze, pensava u sgiò Babbu, ma omu si ne pò ghjuvâ. »

S'addirizzò, fece trè passi in la stanza, si girò, tirò à nantu à e punte di u so ghjileccu.

– A mio cara sposa, disse, eccu a mio decisione.

– Sò sicura ch'ella hè perfetta, disse a Signora Mamma, l'ochji arrusiliti da e lacrime, chì u visu di u sgiò Babbu in quella stonda avia in veru qualcosa d'eroicu, cummuvente, è i so capelli luccicavanu più chè mai.

– Dichjarò : avemu da trasfurmà l'usina à cannoni in una usina à fiori.

L'omi d'affari i più grandi anu u secretu di stegiravolte subitanie, di sti cambiamenti bruschi di pettu à e difficoltà.

Omu si messe subitu subitu à u travagliu. U successu fù cum'è una saetta.

A battaglia à colpi di viulette è di balculi avia fattu corre assai inchjostru in lu mondu sanu. L'upinione era pronta. Tutti l'evenimenti accaduti, da i misteriosi furiscimenti, à u nome stessu di a cità, Mirepoil i Fiori, tuttu ghjuvò à u sviluppu di a nova impresa.

U sgiò Trunadisè, à quale omu cunfidò a pubblicità, fece stende per e strade di u circondu tamante banderine duve ellu si pudia leghje :

Piantate i fiori ch'è crescenu in una notte sola

O allora,

*I fiori di Mirepoil
crescenu ancu à nantu à l'acciaghju*

Ma a sò più bella cacciata fù senza dubbitu :

Dite di nò à a guerra, Ma dite la incù i fiori.

I clienti s'affacconu numarosi, è a Casa chì
Luce ritruvò a so prusperità.